

Mighty Talent a gana tur dos corona

ORANJESTAD(AAN):

Den e festival di Calypso y Roadmarch di diasabra, Mighty Talent, Claudius Philips a logra su di 14 corona di calypso y su di diez corona di roadmarch, ganando tur dos e coronanan un biaha mas.

Tabata un anochi di fiesta real den Joe Laveist Sport Park, for di comienzo 7 or anochi te cu ayera madrugada 4 or cu e publico bailando y cantando, apoyando tur e cantantenan, zwaai den laira cu loke nan tin den man, baila di links pa rechts, bula, janga curpa, formando oia di dilanti bay patras y di patras bin dilanti, aplaudiendo y gritando expresando e alegria cu nan ta pasando aden.

Un publico record di por lo menos 7500 hende tabata den Sport Park pa e anochi aki y den madrugada mayoria di nan

tabata presente ainda sperando resultado y despues sigui balia y canta un biaha mas riba e cancion ganador di Claudius Philips, roadmarch "Life in Aruba". Pa a escoge e Rey di Roadmarch, tabata tin un competencia fuerte entre Talent cu su roadmarch y Rusty di Climax cu "Baricade" te cu finalmente ta Mighty Talent a resulta ganador.

Smooth D., Dito Rogers di grupo Choeps a logra di tres lugar cu "Chicken head" cu ultimo simannan a zona fuerte na emisoranan local.

Singing Olivia a sorprende ganando e anochi aki dos trofeo, esun di cuarto finalista di calypso cu "Sexual Harrasment" cu for di su prome presentacion tabata un di e cancionnan pa wordo premia, y tambe su roadmarch "Wind and go down" cu a termina como tercer finalista den



roadmarch.

Den roadmarch, Hendrik Tevreden cu The Creators/BMW a impone su nomber e aña aki, y a termina como cuarto finalista cu "RED Hat" cu for di su prome presentacion tambe tabata un di e fuertenan pa por wordo premia.

Den calypso, Mighty Hippy cu tambe ta un di e cantantenan comenta pa gana premio, a bin termina como tercer finalista cu "City Inspector" cu a pega for di su prome presentacion pa clasificacion. Den Calypso Might Talent tabata tin competencia fuerte di Quick Silver y Lord Cachete cu mas bien segun comentarionan tabata riba mes onda pa premiacion na di dos of di tres lugar, dependiendo kico Talento lo presenta riba anochi final pa defende su titulo.

Cachete cu a presenta cu entre otro Mariachi Perla di Aruba a bin termina como prome finalista superando Quick Silver cu a termina na di 3 lugar como di dos finalista cu su "Thanks for the memories".